



Las soras ston mirar per sesezzas

140 onns han ellas mirau per auters, per malsauns, affons, giuvenils ed attempai. Ussa ston las soras **dominicanas** da Glion organisar il futur per sesezzas. Perquei vendan ellas ussa gl'antieru bein puril **Albertushof**.

AUGUSTIN BEELI/FMR

Piras gadas ha ei fatg la currella che las soras **dominicanas** da Glion vendien il bein puril **Albertushof**. Quei menaschi alla via da Rutschlein, ella vischinonza dalla claustra, ha furniu duront decennis vivonda alla cuminonza claustrala, alla scola digl institut ed era al spital. «Ussa eis ei definitiv, nus essan sedecididas da vender», ha la priura generala, sora **Annemarie Müller**, confirmau el discuors culla FMR. Ella ha fatg allusiun alla communicaziun ch'ella ha tarmess ier allas medias. Suenter ch'il davos migiur haveva bandunau 2015 il bein puril, ha ei pariu che la claustra sappi buca tgei pigliar a mauns cun quei menaschi. Ussa vegn

«Nus essan sedecididas da vender igl **Albertushof**.»

sora **Annemarie Müller**, priura generala claustra Glion

l'immobilia silla fiera. Gl'areal da rodund 14 100 m² cumpeggia duas casas, ina stalla, nu-epls e remisas. «Nus vendin per saver finanziar nies avegnir», motivescha sora Annemarie. Il zercladur 2021 haveva la claustra reorganisau gl'entir possess e fundau ina fundaziun-purtradra. Entochen lu era la facultad dalla claustra importada sil num d'ina uniun.

La reorganisaziun corrispunda alla strategia dil futur. La cuminonza dallas soras **dominicanas** sto ussa mirar per las soras, salvar gl'essenzial e garantir la veta ella vegliadetgna. Il recav dalla vendita digl **Albertushof** survescha sulet-tamein a quei scopo, e buca ad intenziuns speculative. Vender ina tala immobilia ei gnanc schi sempel.